

ԳՐԱՆՈՍՈՒԹՅՈՒՆ ԵՎ ՔՆՆԱԴԱՑՈՒԹՅՈՒՆ

«ՊԱՎԼԻԿԱՆ ՇԱՐԺՄԱՆ ՊԱՏՄՈՒԹՅԱՆ ՈՒՍՈՒՄՆԱՍԻՐՈՒԹՅԱՆ
ԱՂԲՅՈՒՐՆԵՐԸ»¹

Պավլիկյան շարժումը մեկն էր այն «ըմբոստություններից» և «խլրտումներից», որոնք տեղի ունեին Առաջավոր Ասիայում վաղ ֆեոդալիզմի ժամանակաշրջանում: Այդ շարժումը, ծագելով Բյուզանդիայում, անցել էր Հայաստան՝ իբրև պողիկյան շարժում, Բալկանյան թերակղզին՝ իբրև բոգոմիլների կամ բոգոմիլների շարժում, և արևմտյան Եվրոպա՝ իբրև ալբիգյանների շարժում և այլն:

Սակայն Հայաստանում այդ շարժումը պատրաստի հող էր գտել այն օղակում, որը հայոց մեջ քրիստոնեության մուտքից հետո ստեղծվել էր շնորհիվ քաղաքական-սոցիալական նոր պայմանների:

Ի նկատի ունենք այն օղակը, որով իրար հետ էին կապվում մանիքեական-մազդակյան-բոբրորիտոն-մծղնեից (մեսսելյան) աղանդավորական շարժումները, մի կողմից, և թոնդրակեցոց-արևորդյաց շարժումները՝ մյուս կողմից, չհաշված Բաբանի (Բաբելի) գլխավորած ապստամբությունները Անդրկովկասում և Առաջավոր Ասիայում:

Այս բոլոր շարժումների և ըմբոստությունների-խլրտումների շարժիչ ուժը, իհարկե, գյուղացիությունն էր, իբրև արտագրող դասակարգ, որը շահագործման էր ենթարկվում թե՛ աշխարհիկ և թե՛ հոգևոր ֆեոդալների կողմից: Իսկ շահագործումը ծայր աստիճանի էր հասնում — նուրտացման պրոցեսի կապակցությամբ, որն և ստիպում էր գյուղացիությանը գործադրել բռնի ուժ, նույնիսկ զենք, իր տիրակալների դեմ:

Եվ, իհարկե, ճիշտ է դիտել Ֆ. Էնգելսը, երբ աղանդավորական շարժումների մասին գրել է. «Ֆեոդալիզմի դեմ մղվող յուրաքանչյուր պայքար այն ժամանակ (այսինքն միջնադարում) պետք է ընդուներ կրոնական զգեստավորում՝ ուղղվելով առաջին հերթին եկեղեցու դեմ»:

* * *

Հայաստանում վաղ միջնադարում տեղի ունեցած աղանդավորական շարժումների մասին գրել են շատերը. ոմանք՝ դիտելով այն իբրև զուտ լոկալ աղանդավորական շարժումներ, ոմանք էլ (Բ. Սարգիսյանը և Կ. Տեր-Մկրտչյանը)՝ հարակից շարժումների կապակցությամբ: Իսկ Սյունիքի X դարի սկզբների ըմբոստությունը ակադ. Իվ. Զավախիշվիլին որակավորում էր իբրև պարզապես սոցիալական բնույթի ապստամբություն: Սակայն սովետական շրջանի գիտնականների բազմաթիվ հետազոտությունների մեջ իր բնույթով մեկուսի տեղ է զբաղեցրել Առաջին Բաբելյանի (Առաջին Բաբելյանյանի) հոգվածը «Նորք» ամսագրում, 1922 թ. (№ 1, էջ 130—150):

¹ Р. М. Бартиян. Источники для изучения истории павликианского движения. Издание АН АрмССР, Ереван, 1961, 218 стр. Тираж 2000. Цена 87 коп.

Մասնավորապես պավլիկյան շարժման մասին նշանակալից են վերջերս լույս տեսած հետազոտությունները Հ. Կրեգուարի, Շալոլայլերի, Ե. Լիպշիցի, Կ. Յուզբաշյանի, Ստ. Մելիք-Բախշյանի, Լոուսի, Մ. և Հր. Բաբրիկյանների և ուրիշների:

Սրանցից Ստ. Մելիք-Բախշյանի գիրքը «Պավլիկյան շարժումը Հայաստանում» (հայերենը՝ Երևան, 1953 թ., ռուսերենը՝ մեր խմբագրությամբ՝ Երևան, 1955 թ.) ներկայացնում է իրենից հաջող տեսություն պավլիկյան շարժման պատմության, իսկ նորերս լույս տեսած՝ Հր. Բաբրիկյանի գիրքը «Պավլիկյան շարժման պատմության ռուսումնասիրության աղբյուրները» (ռուսերեն, Երևան, 1961 թ.) ամփոփումն է պավլիկյան շարժման վերաբերմամբ գոյություն ունեցող հայկական ու հույն-բյուզանդական սկզբնաղբյուրների:

Այսպիսով այս երկու գիրքը, մեկը մյուսին լրացնելով և սրբագրություններ մտցնելով քննարկվող նյութի մեջ, պարզապես նպաստում է խնդրի լուսաբանության հետագա վերելքին:

* * *

Հր. Բաբրիկյանի գիրքը, որի խմբագիրն է հայտնի բյուզանդագետ պրոֆ. գոկտ. Ելենա Լիպշիցը, լույս է տեսել Հայկական ՍՍՌ Գիտությունների ակադեմիայի հրատարակությամբ:

Այն բացվում է համառոտ առաջարկով (էջ 5—6) և ներածականով (էջ 7—23), որոնց հետևում են երկու հիմնական գլուխներ (էջ 25—104) և բավականին ընդարձակ «Հավելված» բաժինը (էջ 107—257), իսկ վերջում «Օգտագործված աղբյուրների և գրականության ցանկը» (էջ 209—216):

Կրթի հիմնական կմախքը «Հավելված» բաժինն է, ուր բերված են ռուսերեն բաղձմանությամբ հայերեն և հունարեն աղբյուրները պավլիկյանների մասին:

Հայերեն աղբյուրներն են. ա. Աղվանից եկեղեցական ժողովի կանոնները, բ. Հատվածներ Հովհան կաթողիկոս Օձնեցու «Ընդդէմ պավլիկեանց» ճառից, գ. Հատվածներ Ղևոնդ հայոց մեծ վարդապետի «Պատմությունից» և գ. Հատվածներ հայոց նախարար Գրիգոր Մաղիստրոս Պահլավունու ասորոց կաթողիկոսին հասցեագրված պատասխան-թղթից (նամակից):

Հույն-բյուզանդական աղբյուրներն են. ա. «Պետրոս Սիկիլիացու օգտակար պատմությունը՝ Դատապարտում և Հակաճառություն աղանդին մանիքեցոց, որոնք կոչվում են նաև պավլիկյանք, շարադրված Բուղարիայի եպիսկոպոսապետի համար» — գիտական հրատարակչի կողմից կցված 150 ծանոթագրություններով հանդերձ. բ. «Սրբազնագույն Փոտ[պատրիարք]ի պատմումը մանիքեցոց երկրորդ վերածման մասին» և գ. Պավլիկյանց պատմության համառոտ զրույցը, որը մեզ հասել է Գևորգ Աբեղայի ժամանակագրության էսկուրիալի ձեռագրում:

Այս աղբյուրների մանրամասն քննությունն է, որ ներկայացված է գրախոսվող գրքի առաջին և երկրորդ գլուխներում, ուր, սակայն, ընկեր Հր. Բաբրիկյանը հանգամանորեն խոսում է նաև այլ աղբյուրների մասին, որոնց թարգմանությունները չի տալիս իր գրքի «Հավելված» բաժնում:

Այսպես, օրինակ, հայկական աղբյուրներից քննության են առնված Դվինի 554 թ. և Պարտավի 768 թ. եկեղեցական ժողովների կանոնները, իսկ հունական աղբյուրներից այլևայլ ժամանակագրություններ, վարքագրություններ և այլ տեսակի գրվածքներ:

«Պավլիկյան շարժման պատմության ուսումնասիրության աղբյուրներ» դիտական հրատարակիչը, հավասարապես տիրապետելով հայերեն-գրաբարին և հին ու նոր հունարենին, ինչպես նաև եվրոպական լեզուներին, քաջ առ քաջլ քննում է հետազոտության նյութին վերաբերող բնագրերը, որոնց մեջ մտնում է ճշտումներ, սրբագրություններ և այլն, նաև վերանայում է նախորդ հետազոտողների դրույթները, որոնց նկատմամբ ասում է իր հեղինակավոր խոսքը՝ Ընդամին չի կարելի չնշել, որ գրախոսվող հրատարակության փայլուն էջերն են կազմում քննական տեսությունները, նվիրված Պետրոս Սիկիլիացու «Օգտակար պատմության» և Փոտ պատրիարքի՝ մանիքեցոց երկրորդ վերածլման մասին պատումի փոխհարաբերությանը կամ փոխադարձ կապի (առնչության) խնդրին:

Կասկածից դուրս է, որ գրախոսվող գիրքը նշանակալից ներգրում է, մի կողմից, պավլիկյան շարժման պատմության բնագավառում, և, մյուս կողմից, հայ-բյուզանդական փոխհարաբերությանը պատմության համար:

* * *

Ի վերջո, կուզեինք կանգ առնել Հր. Բարթիկյանի գրքի մի քանի թերությունների վրա:

1. Պավլիկյանց և նրանց հարակից աղանդավորական շարժումների մասին խոսելիս անտես է առնված Պողոս Տարոնեցու «Թուղթ ընդդէմ Թէոփիստիայ» (Կ. Պոլիս, 1752)²:

2. Ժամանակակից դիտա-հետազոտական գրականությունից հրատարակչի ուշադրությունից վրիպել է Մառաֆիա ա. ե. Օրմանյանի «Աղգապատումը», հ. I (1913 թ., էջ 816—818) և ակադ. Ն. Մառի «Անի» աշխատությունը (Մոսկվա—Լենինգրադ, 1934, էջ 30—31), ուր տրված են արժեքավոր դիտողություններ պավլիկյանց և հարակից աղանդավորական շարժումների որակավորման գծով:

3. Գիրքը թեև մշակված է լավ ուսերենով, սակայն զերծ չէ ոճական սայթաքումներից, որոնցից այստեղ կնշենք լոկ մի օրինակ:

Տպված է (էջ 27)³

К. Тер-Мкртчян, ошибочное представление Иоанна Одзунского о павликианах, что не соответствует тому, что мы знаем о еретиках по греческим источникам, объясняет тем, что «павликиане Одзунского имеют совершенно другое происхождение,...».

ուղիղ՝

Ошибочное представление Иоанна Одзунского о павликианах, не соответствующее тому, что мы знаем о еретиках по греческим источникам, К. Тер-Мкртчян объясняет тем, что «павликиане Одзунского имеют совершенно другое происхождение,...».

4. Ավելորդ չէր լինի, մեր կարծիքով, պավլիկյանների աղանդի անվան ծագման խնդրի լուսաբանումը ևս, երբ հոլովվում է Պողոս Սամոսատցու անու-

² Հմմ. Մեհ հոդվածներ՝ «Արշավ» (Թբիլիսի), 1940 թ., № 2, էջ 51—52, «էջմիածին», 1960 թ., № 4, էջ 38—44:

³ Ընդգծումները մեջբերումների մեջ մերն են. Լ. Մ.-Բ.:

նր (Հմմ. Մ. Օրմանյան, Ազգապատում, I, էջ 816), Սրա կապակցությամբ գուցե նպատակահարմար լիներ հայոց հմայիլների հետախուզումը, քանի որ այդտեղ է, որ երևան է գալիս Պողոս Սամսատցու քրիստոսաբանական դոկտրինան (Հմմ. մեր հոգևածները «Христ. Восток» ժուռնալում, հ. III, 1914 թ., էջ 48, 204, և ն. Մառի դիտողությունը, նույն տեղ, էջ 205, ծանոթագրություն 1)։

* * *

Օգտվելով առիթից, կուզեինք նշել նաև, որ պավղիկյանց շարժման հեռավոր արձագանքը առկա է Վրաստանում «Պուբլիկան» տեղանվան մեջ, որով հայտնի է գյուղատեղ մոլոկանների Վլադիմիրովկա կոչված ավանին կից, Զավախքի Փարվանա լճի արևմտյան ափին⁴։

Իսկ այս հանգամանքը առիթ է տալիս մեզ մատնանշելու առկայությունը Վրաստանում նաև պավղիկյաններին նախորդող բորբորիտոնների և մծղնեից (մեսսելյան) աղանդավորների, ինչպես և հետագա թոնդրակեցիների⁵։

Լ. ՄԵԼԻՔՍԵԹ-ՔԵԿ

⁴ Լ. Մելիքսեթ-Քեկ, Մեզալիթյան կուլտուրան Վրաստանում, Թբիլիսի, 1939, էջ 60 (վրացերեն)։

⁵ Լ. Մելիքսեթ-Քեկ՝ 1) Դավիթ «Անհաղթի» Վրաստանում լինելու հարցի շուրջը. «Գրական-բանասիրական հետախուզումներ», 1, Եր., 1946, էջ 259—260. 2) Դավիթ Անհաղթը և Դավիթ Գարեսջեին. ժողովածու նվիրված Կ. Կեկելիձեի ծննդյան 80-ամյակին, Թբ., 1959, էջ 208—210, 220—221 (վրացերեն). 3) Վրաց աղբյուրները Հայաստանի և հայերի մասին, II, Եր., 1936, էջ 122. 4) Հայ հին գրականության պատմությունը, Թբ., 1941, էջ 107 (վրացերեն). 5) «Արշավ», 1940 թ. № 2, էջ 53. 6) «Էջմիածին», 1960 № 4, էջ 43. 7) «Կամուրջ» ամսանախ, Թբ., 1961, էջ 347։